

# INUIT ATAQATIGIIT

## INATSISARTUNI



UKA 2013/80  
3. oktober 2013  
Harald Bianco

**Kalaallit Nunatsinni innuttaasut amerlanerit kalaallisut oqalussinnaalernissaannik periusissiatut iliuusissanut pilersaarummik kingusinnerpaamik Inatsisartut 2014-mi upernaakkut ataatsimiinneranni saqqummiunneqartussamut Naalakkersuisut suliaqaqqullugit Inatsisartut aalajangiiffigisassaattut siunnersuut.**  
(Inatsisartunut ilaasortaq Mimi Karlsen, Inuit Ataqatigiit)

Inuit Ataqatigiinnit siunnersuuteqartoq paasilluarlugu taamatut siunnersuuteqarneranik sakkortuumik taperserparput. Siunnersuuteqartup annermik tikkuartorpaa, meeqqat atuarfianni kalaallisut ilikkartitsiniarnerup annertusarneqarnissaa. Siunnersuuteqartup taamatut tikkuartuina tunngavis-saqarluarpoq, tassami 2009-mi nunatta namminersulerneranut atatillugu kalaallisut oqaatsivut salliutinneqartussatut aalajangiiffigineqarput. Minnerunngitsumik oqaatsinut politikki pillugu Inatsisartut inatsisaat nr. 7, maajip 19-iani 2010-mi aalajangersagaq qiviaraanni kalaallit oqaatsitta pimoorullugu salliutillugit atorineqalernissaat tassani aamma naqissuserneqarput.

Inuit Ataqatigiinni ilanngullugu isumaqarpugut Nunatsinni oqaatsit assigiinngitsut ilinniarneqartassasut, pingaartipparpulli kalaallisut oqaatsigut pisortatigoortumik oqaasiusut sapinngisamik amerlanerit ilikkarneqarnissaat. Tamannalu oqarluartaarnikut isorinninnikkuinnarlu anguneqarsinnaanngimmat pilersaarusiorneqartariaqarpoq. Pilersaarusiornikkut inuit toraagassaqartinneqalissapput, ataatsimoorussamik anguniagaqartilugit.

Atuarfimmi angusat ulloq manna tikillugu qiviaraanni, angusat ataatsimut isigalugit suli annertuumik ernumanartortaqarput, tassami meeqqat atuarfianniit anisut affangajaat angusakinneq pissutigalugu ingerlariaqqinneq ajorput. Taassumaannaalluunniit takutippaa, meeqqat atuarfianni suli annertuumik pitsanngorsaasariaqartugut, minnerunngitsumik suli annertuumik qanoq iliuuseqartariaqartugut. Taamaattumik assut tupaallannarpoq siunnersuut Naalakkersuisut ilalinngimmassuk, naak qineqqusaarnermi kalaallit oqaatsitta salliutinneqarnissaannik annertuumik nilliasimaluarlutik.

Taamatut ilaliinginneq annernarpoq, ingammik qinigaaffimmi siuliani Inatsisartuni ilaasortaqativut qallunaatut oqaluttut allaat maani oqaluttarfimmi mattunniarneqaleraluarnerat eqqaasagaanni.

Tupigusunnalaarpoq siunnersuutigineqartup imarisaanut atatillugu taamaallaat inersimasut Naalakkersuisunit taakkartorneqarmata. Kisianni taakkununga Naalakkersuisut pilersaarutaat Inuit Ataqatigiinnit paasilluarlugit ilalerparvut.

Naggataatigut oqaatigeqqiinnassavara, pingaarnerpaatut pineqartoq, tassa meeqqat atuarfianni ilikkartitsiniarnissamik siunertaq Naalakkersuisut eqqaanngilluinnarmassuk tamannami assut uggorigatsigu.

Siunnersuut ilalerlugu, atatsimiititaliamut susassaqartumut suliareqqitassanngorlugu innersuupparput.